

TIMOR-LESTE NIA FRONTEIRAS TERESTRES HO INDONÉZIA

Timor-Leste ho Indonézia iha relasaun bilateral no kooperasaun diak tebes iha área oioin. Nasaun rua ne'e sai hanesan ezemplu global ba rekonsiliaun no amizade. Timor-Leste ho Indonézia fahe illa Timor: Indonézia iha loromonu no Timor-Leste iha lorosa'e nune'e mos enklave Oe-Cusse Ambeno. Tanba nee mak nasaun rua ne'e prezisa estabelese fronteiras terestres.

Turi fali konsiliaun UNCLOS 2018 ne'ebé susesu ho Austrália no ratifika tiha Tratadu Fronteira Marítima, ne'ebé estabelese ona fronteiras marítimas permanentes entre Timor-Leste ho Austrália iha Tasi Timor, Timor-Leste haré fila fali ba nia fronteiras marítimas ho Indonézia. Maibé, tanba tuir prinsípiu lei internacional nian "rai mak ukun tasi", prezisa rezolve uluk fronteiras terestres nia pontu ikus molok finaliza fronteira marítima ida.



Saida mak akontese iha pasadu? / Saida mak Estadu rua ne'e konkorda tiha ona?

Hafoin Timor-Leste restaura tiha nia independénsia iha 20 Maiu 2002, Timor-Leste ho Indonézia hahú ko'alia kona-ba sira nia fronteiras terestres. Sira konkorda katak sei bazeia sira nia fronteiras terestres ne'e ba Konvensaun 1904 entre Olanda ho Portugal ne'ebé Hafahe Área Portugese ho Olandez nian iha Illa Timor, no dokumentu legal relevante sira seluk.

Iha 8 Abril 2005, Estadu rua ne'e asina ona Akordu Provizóriu ida kona-ba Fronteiras Terestres ne'ebé hafahe área lubun boot ida ona.

**FIXA
INFORMASAUN
2020**

Aprende tan @ www.gfm.tl ka kontaktu:
Gabinete Fronteiras Marítimas
Konsellu ba Delimitasaun Definitiva ba Fronteiras Marítimas
Governu Demokrátika Repúblika Timor-Leste
e: info@gfm.tl tel: +670 7742 5544



**Gabinete
Fronteiras
Marítimas**

Se mak lidera negosiasaun fronteiras terestres ho Indonézia?

Ho objetivu atu hetan lalais Rezolusaun ba fronteiras terestres no sentraliza no koordena ba delimitasaun fronteiras hotu, Governu, hasai Rezolusaun No. 22/2018 iha 5 Dezembru 2018, hodi hili, S.E. Kay Rala Xanana Gusmão hanesan Governu nia Representante Especial ba Negosiasaun kona-ba Fronteiras Terestres ho Indonézia.

S.E. Embaixador Roberto Soares, Asistente Especial ba S.E. Kay Rala Xanana Gusmão, mak lidera Ekipa Técnica Negosiasaun ba Fronteiras Terestres nian. Gabinete Fronteiras Marítimas fó asiténsia legal no tekniku hodi apoiu Timor-Leste nia representate nain rua ne'e bele hala'o sira nia knar ho didiak.

Gabinete Fronteiras Marítimas servisu hamutuk ho Ministériu Negosius Estranjeirus no Kooperasaun ne'ebé mos apoiu Representante Especial no hola parte importante iha ekipa negosiasaun ho Indonézia.

Progresu negosiasaun fronteiras terestres nian to'o iha ne'ebé ona?

Ho lideransa S.E. Kay Rala Xanana Gusmão nian, prosesu diskusaun ho Indonézia nian inklui reuniaun formal balu hanesan tuir mai ne'e:

- Hahú Konsultasaun Oficial Senior iha Bali iha 2015, no Konsultasaun daruak iha Dili no datolu hala'o iha Bandung;
- Iha 13-14 Dezembru 2018, halao Konsultasaun Oficial Senior nian ba dahat ne'ebé Timor-Leste mak sai uma nain iha Dili;
- Iha 29 Abril – 15 Maiu 2019, Vizita conjunta hodi hafahe segmentu Bidjael Sunan-Oben no halo peskiza ba Segmentu Noel Besi/Citrana;
- Iha 1-3 July 2019, iha Konsultasaun Oficial Senior nian ba dalima ne'ebé Indonézia mak sai uma nain iha Bali;
- Iha 22 Julu 2019, S.E. Kay Rala Xanana Gusmão no S.E. Jeneral Wiranto asina "Akordu Prinsipius" hanesan matadalan ba rezolusaun fronteiras terestres nian;
- Iha 14 - 15 Agostu 2019, Indonézia konvida Timor-Leste hodi hala'o 'Desktop Study' ida, ko'alia kona-ba kestaun tékniku ba segmentu hirak ne'ebé presiza rezolve; no
- Iha 4 - 5 Feveireiru 2020, S.E. Kay Rala Xanana Gusmão hasoru malu ho Ministru Kordenador ba Asuntus Polítikus, Jurídikus no Seguransa, S.E. Mohammad Mahfud MD, no Ministru Negosius Estranjeirus, S.E. Retno Marsudi, hodi konfirma no hametin nasaun rua nia kompromisu hodi finaliza fronteiras terestres.

Saida mak Estadu rua ne'e presiza atinji?

Molok finaliza fronteiras terestres iha área balu mak nasaun rua ne'e presiza rezolve. Segmentu hirak ne'e ho karatéristika ne'ebé komplikadu ka presiza hala'o diskusaun ho klean liu tan. Ezemplu, iha Noel Besi/Citrana iha Oe-Cusse Ambeno, Estadu rua ne'e presiza hetan akordu ida kona-ba pontu determinantes hodi sukat husi rai maran ba tasi.

Timor-Leste ho Indonézia oras ne'e daudaun organiza hela 'Desktop Study' hodi buka solusaun ba kestaun tékniku sira, hanesan hakat tuir mai iha prosesu delimitasaun nian. Iha ona hanoin katak fronteiras terestres ne'e sei finaliza iha 2020 nia laran, maibé ho pandemia global COVID-19 ne'e, reuniaun sira sei para hela. Timor-Leste ho Indonézia kontinua servisu hamutuk hodi finaliza fronteiras terestres no diskusaun formal sei hahú fali bainhira situasaun COVID-19 ne'e diak ona.